

Erich Bolinius

Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 29.9.2011 18.00 Uhr auf 94.0 bzw. 87,7

Moin, leev Toehörers,

mi was lever, ik kunn weer mit Bliedskupp van 'n wunnen Spöl van Kickers Emden vertellen. Man, Fleitjepiepen. Ok dat Spöl tegen Braunschweigs 2. Mannskupp gung mit 2:3 verloren. „De Braunschweigers wassen lüttje Tick beter. Wi hemmen achtern toevöl Fehlers maakt“, see Kickerstrainer **Uwe Groothuis** na dat Spöl.

De ruugweg 70 Braunschweiger Toekiekers müssen 40 Menüten wachten, bevör dat Spöl anfleit worden kunn. De Emders harren in 'n Stau tüsken Peine un Braunschweig stahn. De Kickersfans, de mit 'n Bus fahren wassen, gung dat noch schlechter. Se kwammen eerst in de 70. Menüte up Platz. Do was nett dat tweed Tor för Braunschweig fallen. Ja, mennigmaal löppt 't all skeev.

Kickers kwamm anfangs heel goed in 't Spöl. De beste Kans harr **Adan Coronado** in de 15. Menüte, as he heel freei vör Braunschweigs Torwart updukte. Man he reageerte heel best. Kickers gung dör 'n Elfer van **Steven Janßen** in de 31. Menüte in Föhren. Vörher was Kickerstorjager **Andreas Gerdes-Wurpts** in de Braunschweiger Straafruom toe Fall brocht worden. Man Kickers kunn sük neet lang over de Föhren freien. Al twee Menüten later landte de Ball in dat Nett van 't Kickers-Tor. Na 'n Ecke haute Kickers de Ball toe kört rut un **Thomas Krusch** kunn toe dat 1:1 Utglik insketen.

Na de Pausentee spölten dann den Braunschweigers bedüdent feller. Al in de 58. Menüte harren se 'n heel groot Torkans. Aber in de 70. Menüte dann doch dat 2:1 un dann in 85. Menüte sogaar dat 3:1. Dat Spöl was lopen, meenten de nu ruugweg 100 Toekiekers. Aber **Didier Webessi** mook dat Spöl noch maal weer spannend. He tankte sük dör un kunn toe dat 2:3 inskuben. Doch mehr sprung för Kickers neet mehr rut.

Kickers sackte dör dat verlorene Spöl mit blot 8 Punkten up de 12. Platz in de Oberligatabell of. Dat word 'n stur Saison för Kickers. Dat harr 'k neet docht!

Saterdag um Klock twee geiht dat tegen Göttingen 05 um 'n heel Bült. Kickers mutt, na fiev Spölen de neet mehr wunnen wurren, ennelt weer dree Punkten infahren.

Dit maal löv ik wiers, dat Kickers dat Spöl tegen Göttingen, de sünd ok neet recht in Trapp komen, liggen up de 14. Platz, winnen deit. Ik tipp up 'n 3:0. Hopentlik laten de Fans Kickers Emden nu neet in Stich. Jüst nu bruukt de Mannskupp Toekiekers, de hör luudstark anführen. Bün gespannt, wo full dat Oostfreesland-Stadion word. Ik röp all oostfreeske Foetballfans toe: Koomt Saterdag na Emden un kiekt joe dat Spöl tüsken Kickers un Göttingen an.

So, nu noch as alltied, 'n kört Foetballwitz:

An Stammtafel: „...segg maal, versteiht Joes Trainer würrelk wat van Foetball?“

„Aber klar doch! Vör de Spöl vertellt he uns, wo wi winnen können un na dat Spöl analyseert he, worum wi verloren hemmen!!“

So leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied, plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.